



AUTORITETI I
KONKURRENCËS

RAPORTI VJETOR 2016

Sfidat e Institucionit për vitin 2017

“ Telefonia celulare, gazi dhe nafta, standardizimi, certifikimi, transporti, produktet e qumështit, aparatet dhe medikamentet farmaceutike, janë tregje në **KONKURRENCË**, profesionet e lira, hoteleri turizëm, tregu i sigurimeve, tregu energjisë, rregullimi **NË** sistemin bankar, peshkimi, produktet blegtorale dhe bujqësore, zyrat e pasurive të paluajtshme, **GJITHÇKA**, tregu i mediave audiovizive, prokurimet publike ”

- 02** 30" PËR TË KUPTUAR KONKURRENCËN
- 03** MISIONI, DATAT / EVENTET KRYESORE
- 05** FJALA E KRYETARIT TË KOMISIONIT TË KONKURRENCËS
- 06** LEGJISLACIONI SEKONDAR
- 07** TREGJET E MONITORUARA
- 08** PROCEDURAT HETIMORE
- 13** PËRJASHTIMET NGA NDALIMI
- 14** PËRQENDRIMET
- 15** TË DREJTAT EKSKLUZIVE
- 16** RISHIKIMI GJYQËSOR
- 17** ADVOKACIA E KONKURRENCËS
- 18** TRANSPARENCA
- 19** INTEGRIMI EUROPIAN
- 20** BURIMET NJERËZORE
- 21** SFIDAT 2017

30"për të kuptuar konkurrencën

STATUSI

Organ
Publik
i Pavarur

5

Komisionerë

37

Punonjës

84

Ditë trajnimi
për Stafin


63.8

milionë lekë

BUXHETI PËR 2016

52

Vendime Komisioni



MISIONI

MBROJTJA E KONKURENCËS SË LIRË DHE EFEKTIVE NË TREG



10 SHKURT 2016

Hetimi paraprak në tregun e qumështit dhe nënprodukteve të tij.

17 MARS 2016

Gjykata Administrative e Apelit, Tiranë vendos rrëzimin e padisë së “Tirana Urban Trans” dhe lë në fuqi vendimin e Komisionit të Konkurrencës.

16 SHTATOR 2016

Hetimi i përgjithshëm në sektorin bankar.

5 TETOR 2016

Miratohet rregullorja mbi procedurat e angazhimeve.

20 TETOR 2016

Komisioni i Konkurrencës jep rekomandime për ligjin “Për Sigurimin e Detyrueshëm në sektorin e transportit”.

4 MARS 2016

Seminar për përqendrimet me rastin e Ditës Kombëtare të Konkurrencës.

21-22 PRILL 20-30 QERSHOR 2016

Trajnimi i gjyqtarëve nga projekti UNCTAD.

19 MAJ 2016

Kuvendi miratoi rezolutën “Për vlerësimin e veprimtarisë së AK-së për vitin 2015”.

9 NËNTOR 2016


Komisioni Evropian publikon Raportin e Progresit për vitin 2016 për Shqipërinë, ku vlerëson se Shqipëria është mesatarisht e përgatitur në fushën e politikës së konkurrencës.

Vendimet e Komisionit të Konkurrencës në vite.

445

	2004	2005	2006	2007	2008	2009	2010	2011	2012	2013	2014	2015	2016
Vendime në total	13	17	14	25	29	36	34	43	48	42	42	51	52
Përqendrime	2	-	4	9	11	8	6	10	9	13	8	11	12
Abuzim me pozitën dominuese	-	-	-	1	1	1	3	2	2	0	3	3	5
Marrëveshje të ndaluara	-	-	-	3	-	2	2	2	2	1	7	6	7
Përfjashtime nga marrëveshjet	-	-	-	-	1	1	-	-	1	1	1	1	4
Rregullore dhe udhëzues	6	2	-	4	4	2	7	6	5	3	2	3	5
Rekomandime ndaj institucioneve publike	1	3	1	2	5	10	5	5	5	1	4	11	12
Vendime për vendosje gjobe	-	1	1	5	-	2	2	1	7	2	2	0	0
Masa të përkohshme	-	-	-	-	-	-	-	-	-	1	0	1	0
Kushte dhe detyrime	-	-	-	-	-	-	-	-	-	-	1	2	1
Vendime të tjera	4	12	9	6	7	12	11	18	24	22	14	15	6

Statistika mbi përqendrimet në vite.



Bashkëpunimi

Pjesë e Rrjetit Ndërkombëtar të Konkurrencës (ICN).

Projekt me Konferencën e Kombeve të Bashkuara për Tregtinë dhe Zhvillimin (UNCTAD).

Pjesëmarrës në trajnimet e Organizatës për Bashkëpunim dhe Zhvillim Ekonomik (OECD).

FJALA E KRYETARIT TË KOMISIONIT TË KONKURRENCËS

Prof. Dr. Juliana Latifi

“Konkurrenca nuk shërben vetëm si bazë për mbrojtjen e konsumatorëve; ajo është stimul për vetë progresin” - Herbert Hoover

Viti 2016, ishte një vit kompleks ku sfidat për rigjallërim të shpejtë të ekonomisë botërore hasën në zhvillime të paparashikuara politike, ekonomike financiare dhe sociale. Pas përfundimit të tij, kanë dalë analizat e para të cilat theksojnë se 2016 do të kujtohet për: rritjen e pabarazisë sociale e cila i ka hapur dyert rritjes së populizmit politik; daljen e Britanisë së Bashkuar nga Bashkimi Europian ose siç njihet ndryshe me termin BREXIT; rritjen e pasigurisë globale dhe krizën e refugjatëve; rritjen e protagonizimit të Rusisë në arenën ndërkombëtare; planin ambicioz të reformave të shpallura nga Kina; rritjen e plogët dhe paqëndrueshmërinë e tregjeve.

Në planin e brendshëm viti i kaluar do të përmendet për përpjekjet e gjithanshme të cilat kulmuan me miratimin konsensual nga ana e Kuvendit të Shqipërisë së reformës në drejtësi në muajin korrik 2016. Miratimi i kësaj reforme vlerësohet maksimalisht edhe nga Autoriteti i Konkurrencës, pasi zbatimi i saj do të rrisë më tej shanset për të imponuar në treg lojë më të ndershme ku shpirti i lirë i sipërmarrjes i kombinuar me një konkurrencë të lirë do të garantojë më shumë prosperitet dhe zhvillim.

Duke vlerësuar ecurinë e ekonomisë në përgjithësi, viti 2016 u karakterizua nga një gjallërim i mëtejshëm i aktivitetit ekonomik. Ndërkohë falë dhe përpjekjeve dhe kontributit të Autoritetit, efektiviteti i tregjeve ka ardhur në rritje duke garantuar një shpërndarje resursesh financiare dhe të mirash materiale më të njëtrajtshme dhe më gjithëpërfshirëse. Aktiviteti i Autoritetit të Konkurrencës për gjatë gjithë vitit ka qenë i orientuar në përmbushje të misionit kryesor ligjor: “për sigurimin e një konkurrence të lirë dhe efektive në treg”.

Fokusi i veprimtarisë së Autoritetit ka qenë jo vetëm monitorimi, analizimi, dhe evidentimi i situatave të paqarta dhe të dyshimta por edhe propozimi i masave dhe rekomandimeve konkrete për kapërcimin e tyre. Moto jonë institucionale përgjatë gjithë vitit të kaluar ishte se nxitja dhe mbrojtja e konkurrencës së lirë mbi gjithçka i shërben interesave të konsumatorit të thjeshtë dhe prosperitetit ekonomik dhe social afatgjatë të vendit.

Qëllimi ynë ndërmjet të tjerash synoi shndërrimin tonë në një burim idesh për të ndihmuar autoritetet vendimmarrëse në identifikimin dhe hartimin e reformave strukturore, për të mundësuar në këtë mënyrë çlirimin e potencialeve të fjetura për inovacion dhe rritje të qëndrueshme. Në vazhde me traditat më të mira ndërkombëtare Autoriteti i Konkurrencës i kushtoi vëmendje të veçantë identifikimit dhe analizimit në detaje të çështjeve specifike të cilat vlerësohen se kanë rëndësi sistemike. Ne besojmë se adresimi me shpejtësi i gjetjeve dhe rekomandimeve tona do të çojë në përmirësime thelbësore të rëndësishme të degës, të sektorit, apo të politikës ekonomike; pse jo të një apo disave njëkohësisht.

Nga një këndvështrim institucional fundi i vitit 2016 përkon me zgjedhjen nga ana e Kuvendit të Kryetarit të ri të Autoritetit të Konkurrencës pas përfundimit të mandatit të kryetarit të mëparshëm. Për këtë qëllim në axhendën e veprimtarisë së Autoritetit për vitin 2017, janë përfshirë një sërë objektivash institucionale të cilët përveç përmirësimit të qeverisjes së Autoritetit do të mundësojnë dhe forcimin e rolit të Autoritetit në kapacitetin e tij analizues, këshillues dhe penalizues.

Rishikimi i ligjit “Për Mbrojtjen e Konkurrencës”, rishikimi i bazës nënligjore dhe i strukturës organizative të institucionit vlerësohen prioritare për vitin 2017. Përshtatja e tyre me sfidat e kohës dhe përputhshmëria me frymën e BE do të jenë drejtimet ku do të ndalemi më konkretisht.

Në emër të Autoritetit të Konkurrencës dëshiroj të garantoj Kuvendin e Shqipërisë se veprimtaria e tij do të jetë në frymën e ligjit në rezonancë të plotë me objektivat kombëtare për zhvillimin ekonomik financiar të qëndrueshëm të vendit dhe përafrimin e pandërprerë me Bashkimin Europian.

Skema e realizimit të angazhimeve.




Komisioni i Konkurrencës me vendimin nr. 419, datë 08.06.2016 miratoi udhëzimin “Për procedurat e thjeshtuara për trajtimin e disa përqendrimeve”, i cili synon të ofrojë mënyra lehtësimi dhe afate kohore të shkurtuara për disa lloje përqendrimesh, të cilat nuk sjellin pengim, kufizim apo shtrembërim të konkurrencës në treg. Udhëzimi, bazuar në natyrën e përqendrimit, nuk kërkon analiza të detajuara, lehtëson ndërmarrjet nga sigurimi i informacioneve të detajuara, dhe lejon Komisionin e Konkurrencës të autorizojë përqendrimin pa kryer hetime të mëtejshme dhe analiza të mirëfillta ekonomike.


Komisioni i Konkurrencës me vendimin nr. 437, datë 05.10.2016 miratoi rregulloren “Mbi procedurat e angazhimeve”, me objekt përcaktimin e rregullave dhe të procedurave, që zbatohen në rastet e përfundimit dhe mbylljes së procedurave hetimore, nëpërmjet vendimeve me angazhime.

TREGJET E MONITORUARA DHE HETIMET PËR MARRËVESHJET E NDALUARA DHE POZITËN DOMINUESË

Monitorime të kryera gjatë vitit 2016 sipas tregjeve përkatëse.




Hetimet për marrëveshjet e ndaluara dhe pozitën dominuese gjatë vitit 2016 sipas tregjeve përkatëse.



DISA HETIME PËR MARRËVESHJET E NDALUARA DHE POZITËN DOMINUESE

Procedurat hetimore për marrëveshjet e ndaluara dhe abuzim me pozitën dominuese në vite.



Prodhimi, grumbullimi, përpunimi dhe eksporti i duhanit.

Komisioni i Konkurrencës me vendimin nr. 424 , datë 29.06.2016 vendosi hapjen e procedurës së hetimit paraprak në tregun e prodhimit, grumbullimit, përpunimit dhe eksportit të duhanit. Në përfundim të hetimit, Komisioni i Konkurrencës vendosi t'i rekomandojë Ministrisë së Bujqësisë, Zhvillimit Rural dhe Administrimit të Ujrave:

a. Marrjen e masave për hapjen e tregut të grumbullimit të duhanit të prodhuar në vend, për të nxitur zhvillimin e konkurrencës së lirë dhe efektive në këtë treg.

b. Asistencën e specialistëve të Ministrisë së Bujqësisë, Zhvillimit Rural dhe Administrimit të Ujrave gjatë procesit të kategorizimit të duhanit sipas cilësisë dhe vendosjes së çmimeve përkatëse, të përcaktuara në kontratat midis palëve, gjatë grumbullimit në stacionet e caktuara nga ndërmarrja.

c. Monitorimin e realizimit të pagesave, nga ana e ndërmarrjes “MIKA KORÇA” SHA brenda afateve të parashikuara në kontratën e lidhur nga kjo ndërmarrje me fermerët.



DISA HETIME PËR MARRËVESHJET E NDALUARA DHE POZITËN DOMINUESE

Hetimi paraprak dhe i thelluar në tregun e sigurimit të detyrueshëm motorik ndaj palëve të treta (MTPL e brendshme).

Komisioni i Konkurrencës me vendimin nr. 430, datë 07.09.2016, vendosi hapjen e hetimit paraprak në tregun e sigurimit të detyrueshëm motorik ndaj palëve të treta (MTPL e brendshme), për periudhën hetimore 1 janar - 7 shtator 2016.

Duke qenë se gjatë 10 viteve të fundit, Komisioni i Konkurrencës ka përdorur të gjitha instrumentet në zbatim të ligjit, për rivendosjen e konkurrencës efektive në treg: vendosjen e gjobave të rënda sipas parashikimeve të neneve 4 dhe 74, të ligjit nr. 9121/2003, si dhe rekomandimet për autoritetin rregullator të tregut përkatës, për krijimin dhe nxitjen e konkurrencës në treg; Komisioni i Konkurrencës vlerësoi se në tregjet e rregulluara, entet rregullatore dhe në rastin konkret Autoriteti i Mbikëqyrjes Financiare, gjatë kryerjes së detyrave për rregullimin e veprimtarisë ekonomike të subjekteve nën mbikëqyrje, janë të detyruara të zbatojnë dispozitat e ligjit nr. 9121/2003 dhe të sigurojnë konkurrencën e lirë dhe efektive në tregjet nën rregullim.

Për sa më sipër, Komisioni i Konkurrencës, me vendimin nr. 443 , datë 30.11.2016 vendosi:

a. Angazhimet e ndërmarrjeve objekt hetimi, bëhen të detyrueshme në formën e kushteve dhe detyrime, si vijon: a) lidhjen e më shumë se një kontratave të shërbimit me shoqëritë e brokerimit dhe shoqëritë e agjentëve/agjentë si persona fizikë; b) rritjen e shërbimit ndaj të siguarve sa i përket dëmeve dhe ofrimit të primeve të ndryshme të shitjes, sipas kategorive të klientëve; c) marrjen e masave që në sistemet e tyre shoqëritë të mundësojnë sistemin e diferencuar Bonus/Malus.

b. T'i rekomandojë Komisionit të Ekonomisë dhe Financave të Kuvendit të Republikës së Shqipërisë, të detyrojë Autoritetin e Mbikëqyrjes Financiare për marrjen e masave, për të siguruar konkurrencën e lirë dhe efektive në tregun e sigurimit të detyrueshëm motorik për përgjegjësitë ndaj palëve të treta (MTPL e brendshme), nëpërmjet nxjerrjeve të akteve nënligjore lidhur me: a) zbatimin e plotë të sistemit Bonus/Malus për sigurimin e detyrueshëm motorik ndaj palëve të treta duke diferencuar primet e sigurimit të të siguarve sipas historikut të dëmeve; b) dëmshpërblimin e drejtpërdrejtë për palët e siguruara, që do të rriste ndjeshëm konkurrencën mes shoqërive të sigurimeve.




DISA HETIME PËR MARRËVESHJET E NDALUARA DHE POZITËN DOMINUESE

Hetim i Përgjithshëm në Sektorin Bankar

Komisioni i Konkurrencës me vendimin nr. 373 datë 16.09.2015, vendosi hapjen e hetimit të përgjithshëm në sektorin bankar. Ky hetim, synoi vlerësimin e nivelit të konkurrencës në sektorin bankar, identifikimin e problemeve që mund të sjellin kufizim të konkurrencës dhe dhënien e rekomandimeve për përmirësimin e mjedisit konkurrues, në këtë treg jetik për ekonominë shqiptare.

Tregjet përkatëse, të marra në analizë, përfshijnë: llogari rrjedhëse; depozita me/pa afat; kredi konsumatore; kredi kufi (OVD); kredi hipotekore; karta krediti; karta debiti; transfertat bankare; letra me vlerë në tregun primar, të ofruara nga bankat e nivelit të dytë në territorin e Republikës së Shqipërisë.

Në përfundim të hetimit janë propozuar disa rekomandime drejtuar Bankës së Shqipërisë, me statusin e rregullatorit në tregun bankar, Shoqatës Shqiptare të Bankave dhe bankave të nivelit të dytë ku përfshihet një kapitull i veçantë për rregullimin e konkurrencës në tregjet bankare, në të cilin të përcaktohet kompetenca e Bankës së Shqipërisë për vlerësimin e fuqisë së tregut që ka një bankë në një treg përkatës dhe informimi i Autoritetit të Konkurrencës sa herë dyshohet për abuzim me këtë fuqi tregu ose mundësisë se marrëveshjeve të ndaluara mes bankave. Gjithashtu, u rekomandua riformulimin e pikës 4 të nenit 9 të rregullores së Bankës së Shqipërisë "Mbi transparencën për produktet dhe shërbimet bankare e financiare" si vijon: **Banka duhet të parashikojë në kontratën e llogarisë dhe të depozitës, mënyrën e njoftimit dhe marrjes së pëlqimit të klientit, për ndryshimin e kushteve apo afateve të kontratës së nënshkruar, para se të aplikojë ndryshimin. Në çdo rast, klienti ka të drejtë të heqë dorë nga kontrata, brenda një afati të caktuar nga njoftimi dhe pa asnjë kosto shtesë, në qoftë se ai nuk është dakord me ndryshimet e bëra.**



DISA HETIME PËR MARRËVESHJET E NDALUARA DHE POZITËN DOMINUESE



Hetimi i thelluar në tregun e përpunimit dhe tregtimit të qumështit të ambalazhuar dhe nënprodukteve të tij.

Komisioni i Konkurrencës me vendimet nr. 400, 10.02.2016 dhe nr. 444, datë 30.11.2016, ka zhvilluar hetimin paraprak dhe atë të thelluar në tregun e përpunimit dhe tregtimit të qumështit. Në fund të hetimit, Komisioni i Konkurrencës vendosi t'i rekomandojë Ministrisë së Bujqësisë, Zhvillimit Rural dhe Administrimit të Ujrave, Ministrisë së Financave, Agjencisë për Zhvillim Bujqësor dhe Rural, si dhe Drejtorisë së Përgjithshme të Tatimeve:



a. Verifikimin e mënyrës së funksionimit të skemës së rimbursimit të TVSH-së, në tregun përkatës të përpunimit dhe tregtimit të qumështit të ambalazhuar dhe nënprodukteve të tij, sipas udhëzimit nr. 19, datë 03.11.2014 "Për zbatimin e regjimit të veçantë të skemës së kompensimit të prodhuesve bujqësorë për qëllime të tatimit mbi vlerën e shtuar";

b. Analizën e pasqyrave financiare të shoqërive nën hetim Erzeni SHPK dhe Lufra SHPK, për të parë arsyet e mosreflektimit të shitjeve të rritura nga 2-5 herë, në rezultatin financiar.

Hetim i thelluar në tregun e prokurimit publik, me objekt "Përmirësimi, rifreskimi i sinjalistikës vertikale/horizontale në akset kombëtare dhe përmirësimi i sigurisë rrugore".

Komisioni i Konkurrencës me vendimin nr. 386, datë 14.12.2015, vendosi "Për hapjen e procedurës së hetimit të thelluar në tregun e prokurimit publik me objekt "Përmirësimi, rifreskimi i sinjalistikës vertikale/horizontale në akset kombëtare dhe përmirësimi i sigurisë rrugore".

Komisioni i Konkurrencës me vendimin nr. 409, datë 21.03.2016 i rekomandon Autoritetit Rrugor Shqiptar hartimin e procesit të prokurimit, në mënyrë të tillë, që të nxitet pjesëmarrja e operatorëve të vegjël e të mesëm ekonomikë dhe operatorëve të huaj, si:

a. zvogëlimin e madhësisë së loteve, për të rritur mundësinë e pjesëmarrjes, të sa më shumë operatorëve në proceset e prokurimeve;

b. shmangien sa më shumë të jetë e mundur të bashkimit të operatorëve, si një faktor që rrit mundësinë e bashkëpunimit afatgjatë, në dëm të konkurrencës;

c. përcaktimin e afateve kohore të përshtatshme, për përgatitjen e ofertave, në përputhje me natyrën e objektit të prokurimit dhe vlerën e kontratës që do të prokurohet, në veçanti kur në pjesëmarrje mund të përfshihen edhe operatorë të huaj.

STOP STOP

DISA HETIME PËR MARRËVESHJET E NDALUARA DHE POZITËN DOMINUESE

Tregu farmaceutik.

Komisioni i Konkurrencës me vendimin nr. 415, datë 04.05.2016 hapi procedurën e hetimit paraprak në tregun e importit, shitjes me shumicë dhe pakicë të produktit Insulinë Glarkinë Lantus.

Komisioni i Konkurrencës me vendimin nr. 440, datë 10.11.2016 vendosi për mbylljen hetimit paraprak në tregun e importit, shitjes me shumicë dhe pakicë të produktit mjekësor Lantus (Insulinë), pasi në përfundim të kësaj procedure hetimore, nuk u konstatuan shenja të kufizimit të konkurrencës në këtë treg, për periudhën nën hetim.



Prokurimi publik me objekt “Ruajtje objektsh për vitin 2015”, ndarë në 13 lote, zhvilluar nga Drejtoria e Përgjithshme e Tatimeve.

Drejtoria e Përgjithshme e Tatimeve, paraqiti një ankesë pranë Autoritetit të Konkurrencës lidhur me procedurën e prokurimit të zhvilluar nga Drejtoria e Përgjithshme e Tatimeve, me objekt “Ruajtje objektsh ku është akomoduar administrata tatimore”, e ndarë në 13 lote. Është konstatuar se gjatë hapjes së ofertave të operatorëve ekonomikë dhe veçanërisht në lotin e Tiranës, 6 (gjashtë) prej operatorëve ekonomikë ofertues, kanë paraqitur një ofertë ekonomike me vlerë të barabartë. Nga paraqitja e këtyre ofertave identike, u krijua dyshimi se midis këtyre operatorëve mund të ketë marrëveshje të ndaluara, gjë e cila bie ndesh me ligjin nr. 9121/2003.

Komisioni i Konkurrencës me vendimin nr. 380, datë 02.11.2015 vendosi hapjen e procedurës së hetimit paraprak në tregun e prokurimit publik me objekt “Ruajtje objektsh për vitin 2015”, zhvilluar nga Drejtoria e Përgjithshme e Tatimeve, për të parë nëse ka ose jo, shenja të kufizimit të konkurrencës. Si përfundim, Komisioni i Konkurrencës me vendimin nr. 407, datë 08.03.2016 vendosi t’i rekomandojë Agjencisë së Prokurimeve Publike, që në bashkëpunim me Autoritetet Kontraktore, në rastin e shërbimit të ruajtjes dhe sigurisë fizike:

a. Gjatë llogaritjes së fondit limit, të marrin parasysh mbulimin e të gjitha kostove operative dhe një normë fitimi të shoqërive të sigurisë fizike në një normale sipas llogaritjes së ekspertëve, në mënyrë që të mos caktohet çmimi i ofertuesve nga autoriteti prokurues;

b. Të ndiqet zbatimi i kontratave pasi vendosja e çmimeve anomalisht të ulta, nënkupton mosmarrjen e shërbimit të prokuruar (numri i posteve të rojeve ose turnet/orët e punës më të ulta se ato të kontraktuara);

c. Përjashtimin nga prokurimi publik shoqërive, që kanë marrë pjesë në marrëveshje të ndaluara në prokurimet publike sipas vendimmarrjes të Autoritetit të Konkurrencës.

PËRJASHTIMET NGA NDALIMI I MARRËVESHJEVE

Sipas nenit 5, të ligjit nr. 9121/2003 mund të përjashtohet nga zbatimi i pikës 1, të nenit 4 çdo marrëveshje, e cila kontribuon në përmirësimin e prodhimit ose të shpërndarjes së produkteve, ose në nxitjen e progresit teknologjik apo ekonomik, nëse një pjesë e mjaftueshme e këtyre përfitimeve, shkon në favor të klientëve e të konsumatorëve dhe kur nuk përmban kufizime të veprimtarive të ndërmarrjeve pjesëmarrëse, që nuk janë të domosdoshme për të arritur objektivat e sipërpërmendur; nuk kufizon, në mënyrë të ndjeshme konkurrencën, në lidhje me produktet apo shërbimet, objekt i këtyre marrëveshjeve.

Numri i përjashtimeve nga ndalimi i marrëveshjeve në vite.



PËRQENDRIMET DISA NGA RASTET E AUTORIZUARA

Tregu financiar	4
Ndërtimi	3
Infrastrukturë transporti ajror	2
Hidrokarbure	1
Lotari	1

2016

4 Përqendrimet e autorizuara

Komisioni i Konkurrencës me vendimin nr. 420, datë 08.06.2016, autorizoi përqendrimin e realizuar nëpërmjet përfutimit të kontrollit të “Tirana International Airport” SHPK nga “Keen Dynamics Limited”. Treg përkatës, u konsiderua tregu i shërbimeve të infrastrukturës aeroportuale, që i ofrohen linjave ajrore dhe shërbimet e asistencës në tokë.

Komisioni i Konkurrencës me vendimin nr. 445, datë 13.12.2016 autorizoi përqendrimin e realizuar nëpërmjet përfutimit të kontrollit nga fondi “BESA” SHA të “VisionFund Albania” SHPK. Treg përkatës u konsiderua tregu i kredisë dhe mikrokredisë, të ofruara, nga SFJB-të.

Komisioni i Konkurrencës me vendimin nr. 399, datë 09.02.2016, autorizoi përqendrimin e realizuar nëpërmjet përfutimit të kontrollit të “E.H.W.” SHPK nga një ortak i vetëm. Treg përkatës, u konsiderua tregu i prodhimit dhe përpunimit të mishit (sallameri dhe proshuta) për konsum për njerëzit, si dhe tregtimi i tyre.

Komisioni i Konkurrencës me vendimin nr. 414, datë 04.05.2016, autorizoi përqendrimin e realizuar nëpërmjet përfutimit të kontrollit të plotë indirekt nga “Geo-Jade Petroleum Corporation” të “Bankers Petroleum” Ltd., nëpërmjet 1958082 Alberta Ltd. Treg përkatës, u konsiderua tregu i kërkimit, zhvillimit, prodhimit të naftës dhe gazit natyror, tregtimit dhe eksportit të produkteve të naftës dhe gazit.

Komisioni i Konkurrencës me vendimin nr. 422, datë 22.06.2016 autorizoi përqendrimin e realizuar nëpërmjet përfutimit të kontrollit të “Veneto Banca” s.p.a. nga “Quaestio Capital Management SGR” s.p.a nëpërmjet fondit “Atlante”. Treg përkatës, u konsiderua tregu i shërbimeve bankare për individë dhe korporata.



RISHIKIMI I TË DREJTAVE EKSKLUZIVE

Gjatë vitit 2016, Komisioni i Konkurrencës është shprehur me vendime për dy raste të të drejtave ekskluzive, ku në një rast është kërkuar vlerësimi paraprak nga ana e Ministrisë së Transportit dhe Infrastrukturës; dhe në një rast tjetër, me nismën e vetë Autoritetit të Konkurrencës.

E drejta ekskluzive për infrastrukturën hekurudhore Fier-Ballsh, Fier-Vlorë

Komisioni i Konkurrencës me vendimin nr. 396, datë 26.01.2016 ka dhënë disa rekomandime mbi draft-kontratën koncensionare partneriteti publik-privat i formës ROT “Për rehabilitimin, operimin dhe transferimin e infrastrukturës hekurudhore Fier-Ballsh, Fier-Vlorë”.

Komisioni i Konkurrencës i rekomandon Ministrisë së Transportit dhe Infrastrukturës, që në zbatim të Kontratës të Koncensionit, tarifat e miratuara nga Autoriteti Kontraktor të jenë të orientuara drejt kostos. Ministria e Transportit dhe Infrastrukturës duhet t’i drejtohet Autoriteti i Konkurrencës në rastet kur gjykon se vërehen shkelje të mundshme të ligjit nr. 9121/2003, gjatë periudhës koncensionare.

Vlerësimi i tregut të shërbimit të kontrollit teknik të detyrueshëm të mjeteve rrugore.

Komisioni i Konkurrencës me vendimin nr. 312, datë 18.04.2014 i rekomandon Ministrisë së Transportit dhe Infrastrukturës, që në një periudhë afatshkurtër, të kërkojë nga koncensionari SGS, të krijojë më shumë se një mundësi për zgjedhjen e konsumatorit, për kryerjen e kontrollit të detyrueshëm teknik vjetor të automjeteve në qytetin e Tiranës dhe në periudhë afatgjatë, të shikohet mundësia e ofrimit të kontrollit teknik të automjeteve nga disa operatorë.

Rishikimi i të drejtave ekskluzive në vite

2014

- Pullat fiskale
- Kontrolli teknik i mjeteve
- Skanimi i konteinerëve
- Terminali lindor i Portit të Durrësit
- Lotaria kombëtare

2015

- Porto Romano
- Markimi i karburanteve
- TIA


2016

- Kontrolli teknik i mjeteve
- Hekurudha Fier-Ballsh, Fier-Vlorë



RISHIKIMI I GJYQËSORIT DISA RASTE


çështjet gjyqësore në 3 shkallët e gjyqësorit në vite.



Çështja administrative me Padi të: “PLUS Communication” SHA; i Padi të: Autoriteti i Konkurrencës; Person i Tretë: “Vodafone Albania” SHA dhe AKEP, me Objekt: Ndryshim i pjesshëm i aktit administrativ, vendimi i Komisionit të Konkurrencës nr. 303, datë 16.01.2014. Gjykata Administrative e Shkallës së Parë, Tiranë vendosi rrëzimin e padisë së ndërmarrjes, duke lënë në fuqi vendimin e Komisionit të Konkurrencës. Kundër këtij vendimi nga ana e “PLUS Communication” SHA. është kryer ankimi në Gjykatën Administrative të Apelit Tiranë dhe jemi në pritje të caktimit të datës së gjykimit.

Çështja administrative me Padi të: “AMC” SHA; I Padi të: Autoriteti i Konkurrencës; me Objekt: Pavlefshmëria e vendimit nr. 59, datë 09.11.2007 të KK-së. Gjykata e Rrethit Gjyqësor Tiranë, në lidhje me këtë çështje, ka vendosur rrëzimin e padisë, duke konfirmuar ligjshmërinë e vendimit të Komisionit të Konkurrencës. Kundër këtij vendimi “AMC” SHA paraqiti ankim pranë Gjykatës së Apelit Tiranë, e cila pas shqyrtimit vendosi lënien në fuqi të Vendimit të Gjykatës së Rrethit Gjyqësor Tiranë.

Çështja administrative me Padi të: “Tirana Urban Trans” SHA; I Padi të: Autoriteti i Konkurrencës; me Objekt: Kundërshtim i vendimit nr. 290, datë 23.07.2013 të Komisionit të Konkurrencës, për pjesën që i takon padi tës. Gjykata Administrative e Shkallës së Parë Tiranë, vendosi rrëzimin e padisë së ndërmarrjes, duke lënë në fuqi vendimin e Komisionit të Konkurrencës. Ndërmarrja ka paraqitur ankim në Gjykatën Administrative të Apelit Tiranë, e cila vendosi: Lënien në fuqi të Vendimit të Gjykatës Administrative të Shkallës së Parë Tiranë. Kundër këtij vendimi ka paraqitur Rekurs në Gjykatën e Lartë Padi tësja, Tirana Urban Trans SHA; dhe jemi në pritje të caktimit të datës së gjykimit.



ADVOKACIA E KONKURRENCËS


Gjatë vitit 2016, Autoriteti i Konkurrencës ka marrë në shqyrtim dhe vlerësim, në përputhje me ligjin nr. 9121/2003, si me kërkesë të institucioneve propozuese (apo edhe me nismën e vet), një sërë aktesh dhe projekt/aktesh normative apo specifike. Në vijim disa raste kryesore:

Projekt/Ligji “Kodi Hekurudhor i Republikës së Shqipërisë”.

Projekt/Ligji “Për disa shtesa e ndryshime në ligjin nr. 8691, datë 16.11.2000 “Për prodhimin dhe tregtimin e duhanit dhe të cigareve””.

Udhëzimi i Ministrisë së Transportit dhe Infrastrukturës “Mbi rregullat në vendosjen e tarifave të aeroportit”.

Numri i rekomandimeve të dhëna mbi legjislacionin e tregjeve, mbi bazën e neneve 69; dhe/ose 70, të ligjit nr.9121/2003.



TRANSPARENCA DHE DIALOGU ME AKTORËT E TREGUT

Dita Kombëtare e Konkurrencës, 4 mars 2016. Autoriteti i Konkurrencës në bashkëpunim me studiot ligjore, organizoi një seminar në Tiranë me temë "Praktikat për njoftimin e përqendrimeve", ku tematikat kryesore të diskutimit ishin rëndësia e të dhënave dhe dokumenteve, që duhet të përfshihen në formularin për njoftimin e përqendrimeve, shqyrtimin e praktikave të përfunduara dhe raste nga praktika të ngjashme.



Seminar Rajonal. Autoriteti i Konkurrencës vlerëson shumë të rëndësishëm bashkëpunimin me qeverisjen vendore, si dhe me komunitetin e biznesit. Me këtë synim, në bashkëpunim me Dhomën e Tregtisë dhe Industrisë dhe universitetin "Aleksandër Moisiu" në qytetin e Durrësit, zhvilloi në 28 qershor 2016, takimin e diskutimit për politikën kombëtare të konkurrencës dhe programin e ri të lehtësimit nga gjobat.



INTEGRIMI EUROPIAN DHE BASHKËPUNIMI NDËRKOMBËTAR

Raporti i Komisionit European për Shqipërinë, i publikuar në 9 nëntor 2016, ka vlerësuar disa përparime në fushën e konkurrencës. Lidhur me Kapitullin 8 “Politika e Konkurrencës”, raporti shprehet se janë bërë përpjekje nga Autoriteti i Konkurrencës, për sa i përket zbatimit të ligjit në këtë fushë, kuadrit institucional të pajisur me kompetencat e duhura për të kryer hetime, vijueshmërisë së procesit të përafrimit të legjislacionit.

Problematike në këtë kapitull, vijojnë të rezultojnë vonesat në procedurat gjyqësore, procedurat e konsultimit ex-ante nga Autoriteti i Konkurrencës, të rasteve të të drejtave të veçanta dhe ekskluzive, mosaplikimi i programit të lehtësimit nga gjocat si dhe është kërkuar forcimi i mëtejshëm i kapaciteteve institucionale.

Veprimtaritë kryesore në kuadër të bashkëpunimit me UNCTAD.


Bashkëpunimi me Sofia Competition Forum.

Bashkëpunimi me ICN (Rrjeti Ndërkombëtar i Konkurrencës).




BURIME NJERËZORE

TË DHËNA STATISTIKORE RRETH TRAJNIMEVE TË STAFIT TË AUTORITETIT TË KONKURENCËS.



Ditë trajnimi, sipas fushave për 2016

Numri i punonjësve të trajnuar, sipas fushave për 2016



SFIDAT INSTITUCIONALE TË AK-SË PËR VITIN 2017

Autoriteti i Konkurrencës, do të thellojë veprimtarinë e tij në drejtim të përcaktimit sa më të qartë të rregullave të sjelljes së ndërmarrjeve në të gjitha tregjet, duke ndërhyrë rast pas rasti për të rivendosur konkurrencën e lirë dhe efektive në treg.

Autoriteti i Konkurrencës është i bindur se ka një lidhje të drejtpërdrejtë mes tregjeve konkurruese dhe rritjes ekonomike, ndaj dhe mbetet tërësisht i angazhuar për të mundësuar heqjen e barrierave dhe hyrjet e reja në tregje, për gjetjen e rrugëve të reja mbështetur mbi eksperiencat e deritanishme dhe filozofinë e re të drejtimit, për të përdorur instrumentet dhe të gjitha burimet në dispozicion, administrative, financiare dhe intelektuale për të luftuar monopolet dhe kartelet dhe për t'i dhënë frymëmarrjen e duhur biznesit të ndershëm dhe zhvillimit ekonomik të vendit.

Sfidë për vitin 2017, mbetet bashkëpunimi me institucionet e administratës qendrore dhe vendore, që u japin një/disa ndërmarrjeve, të drejta ekskluzive ose të drejta të veçanta. Autoriteti i Konkurrencës në zbatim të nenit 69, të ligjit nr. 9121/2003, do të vlerësojë shkallën e kufizimit ose të pengimit të konkurrencës, që rrjedh nga projekt-aktet e propozuara, duke informuar rast pas rasti, Kuvendin e Shqipërisë.

Përafrimi institucional me standardet dhe praktikat e BE.

Gjatë vitit 2017, Autoriteti i Konkurrencës do të ndërmarrë hapa konkretë për rishikimin e ligjit nr. 9121/2003, në drejtim të përafrimit sa më të plotë me legjislacionin evropian; si dhe hartimin e akteve nënligjore, me qëllim zbatimin sa më të plotë dhe efikas të legjislacionit në fushën e konkurrencës.


Gjithashtu, do t'i propozohet Kuvendit të Shqipërisë, rishikimi i strukturës dhe rritja e forcimit të kapaciteteve, nëpërmjet trajnimeve sipas sektorëve, me qëllim rritjen e cilësisë së inspektimit, hartimit të raporteve, cilësisë së mbrojtjes së vendimeve të Komisionit të Konkurrencës në proceset gjyqësore.

Nëpërmjet instrumentit të asistencës afatshkurtër TAIEX është miratuar një aplikim i kryer nga Autoriteti i Konkurrencës, i cili pritet të realizohet gjatë 2017.

Autoriteti i Konkurrencës do të jetë përfitues i një projekti IPA II, me vlerë 700 000 euro, që synon të forcojë kapacitetet e tij institucionale, të rrisë advokacinë dhe kulturën e konkurrencës.

Do të vazhdojë bashkëpunimi me UNCTAD, për: forcimin e kapaciteteve administrative të Autoritetit të Konkurrencës; ndërgjegjësimin e administratës publike qendrore dhe vendore; zbatueshmërinë e programit të lehtësimit nga gjobat; organizimin e trajnimeve për sistemin gjyqësor; asistencën në rastet e vlerësimit dhe analizës së sektorëve të rëndësishëm të ekonomisë.

Shënim: Kjo është një Përmbledhje Ekzekutive e Raportit Vjetor 2016 dhe sfidat e Autoritetit të Konkurrencës për vitin 2017. Versioni i plotë është bashkëlidhur. Gjithashtu, një kopje elektronike të Raportit Vjetor 2016 mund të gjendet në faqen zyrtare të Autoritetit të Konkurrencës:
www.caa.gov.al



**AUTORITETI I
KONKURRENCËS**

Rruga SAMI FRASHËRI, nr. 4, kati i IV, Tiranë
+355 42234504 competition@caa.gov.al
www.caa.gov.al